

BOSNA I HERCEGOVINA
Federacija Bosne i Hercegovine
TUZLANSKI KANTON
VLADA

-NACRT-

ZAKON
o izmjenama i dopunama Zakona o osnovnom odgoju i obrazovanju

Tuzla, decembar 2024. godine

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“ broj: 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj _____ godine, d o n o s i

Z A K O N

O IZMJENAMA I DOPUNAMA ZAKONA O OSNOVNOM ODGOJU I OBRAZOVANJU

Član 1.

U Zakonu o osnovnom odgoju i obrazovanju – prečišćeni tekst („Službene novine Tuzlanskog kantona“, br. 10/20, 8/21, 11/21, 22/21, 5/22, 10/22, 11/22 i 12/23) u članu 21. u stavu (1) tekst „ , na prijedlog gradskog ili opštinskog vijeća,“ briše se a iza riječi „škola“ dodaju se riječi „čiji je osnivač Skupština Kantona“.

Stav (4) mijenja se i glasi:

„(4) Izuzetno, s ciljem obezbjeđivanja najboljeg interesa djeteta, Ministarstvo može na zahtjev roditelja dati saglasnost za upis djeteta u školu van školskog područja kojem dijete kao školski obveznik pripada, u skladu sa stavom (5) ovog člana.

Iza stava (4) dodaju se novi stavovi (5) i (6) koji glase:

„(5) Saglasnost iz stava (4) ovog člana Ministarstvo može dati radi zaštite prava djeteta ili ako nađe da je to u najboljem interesu djeteta pod uslovom da se obje škole nalaze na području Kantona i da škola za koju se odobrava upis raspolaže prostornim i svim drugim kapacitetima za upis djeteta.“.

(6) Pod najboljim interesom djeteta u smislu stava (5) ovog člana podrazumijeva se boravak djeteta u produženom boravku u okviru predškolske ustanove, udaljenost mjesta zaposlenja roditelja, uključenost djeteta u slobodne vannastavne aktivnosti kao i postojanje drugih specifičnih razloga za koje Ministarstvo procjeni da su u najboljem interesu djeteta.

Dosadašnji stavovi (5) i (6) postaju stavovi (7) i (8).

Član 2.

U članu 23. iza stava (7) dodaje se novi stav (8) koji glasi:

„(8) Škola čiji je osnivač Skupština Kantona ima zvaničnu internet stranicu i e-mail adresu, koje je dužna redovno ažurirati i pratiti.“.

Član 3.

Iza člana 23. dodaje se novi član 23a. koji glasi:

„Član 23a.

(Simboli i obilježja Bosne i Hercegovine)

(1) U školama je obavezno isticanje simbola i intoniranje himne Bosne i Hercegovine, u skladu sa propisom koji donosi ministar.

(2) Nakon intoniranja himne u školama čiji je osnivač Skupština Kantona intonirat će se i svečana pjesma koju će putem javnog konkursa odabrati Ministarstvo u skladu sa propisom iz stava (1) ovog člana.“.

Član 4.

Član 24. mijenja se i glasi:

„Član 24.

(Zabranjeni simboli u školi)

U prostorima škole zabranjeni simboli su:

a) simboli drugih država (zastave, grbovi stranih država i sl.), izuzev onih koji služe realizaciji nastavnog plana i programa i provođenju školskih aktivnosti,

b) bilo kakvi simboli, uključujući fotografije ili objekti koji se odnose na političke stranke, pokrete, lidere, vjerska i rasna obilježja, izuzev onih koji služe realizaciji nastavnog plana i programa i

c) simboli, uključujući fotografije ili objekte (spomen table, spomenici i sl.) koji se odnose na osobe ili događaje koji su presudama domaćih i međunarodnih sudova dovedeni u vezu sa ratnim zločinima, izuzev onih koji služe realizaciji nastavnog plana i programa.“.

Član 5.

U članu 37. u stavu (7) riječi „značajniji datumi u školi“ zamjenjuju se riječima „obilježavanje značajnijih datuma u školi u skladu sa propisom iz stava (9) ovog člana“.

Član 6.

U članu 39. u stavu (2) u tački a) iza riječi „zagrijavanje“ dodaju se riječi „ili hlađenje“.

Član 7.

U članu 40. u stavu (2) iza riječi „časova“ na kraju stava dodaju se riječi „izuzev ukoliko je realizovano više od 90% nastavnih sadržaja“.

U stavu (3) iza teksta „i/ili“ dodaju se riječi „nastavnih sadržaja odnosno“.

Član 8.

Član 45. mijenja se i glasi:

„Član 45.

(Izlet, stručna posjeta, stručna ekskurzija, ekskurzija, logorovanje, razmjena učenika, studijska posjeta i druge aktivnosti)

(1) Škola organizuje izlete, stručne posjete, stručne ekskurzije, ekskurzije i logorovanja, u skladu sa godišnjim programom rada i bližim propisom o planiranju i organizovanju izleta, ekskurzija i logorovanja koji donosi ministar uz konsultacije sa Pedagoškim zavodom.

(2) Izleti, stručne posjete, stručne ekskurzije, ekskurzije i logorovanja, koja se izvode u skladu sa propisom iz stava (1) ovog člana, a predviđena su godišnjim programom rada škole, računaju se u radne dane.

(3) Stručne posjete i stručne ekskurzije uračunavaju se u nastavne dane učenicima iz predmeta iz kojih je realizovana stručna posjeta, odnosno stručna ekskurzija.

(4) Studijske posjete, razmjene učenika, posjete školama i druge aktivnosti učenika i nastavnika izvan Bosne i Hercegovine realiziraju se uz prethodnu saglasnost Ministarstva a u skladu sa posebnim propisom koji donosi ministar.“.

Član 9.

Iza člana 75. dodaje se novi član 75a. koji glasi:

„Član 75a.

(Opći uslovi za zasnivanje radnog odnosa u školi)

(1) Da bi zasnovalo radni odnos u školi, lice mora ispunjavati sljedeće opće uslove:

- a) da je državljanin Bosne i Hercegovine;
- b) da je starije od 18 godina, a mlađe od 65 godina;
- c) da je zdravstveno sposobno za obavljanje poslova predviđenih za radno mjesto na kojem zasniva radni odnos;
- d) da nije obuhvaćeno odredbom člana IX 1. Ustava Bosne i Hercegovine;
- e) da se protiv njega ne vodi krivični postupak.

(2) Za dokazivanje ispunjavanja uslova iz stava (1) tačka c) ovog člana priznaje se samo ljekarsko uvjerenje koje izdaje ovlaštena zdravstvena ustanova.

(3) Lice kojem je ranije prestao radni odnos u skladu sa odredbama Zakona o radu („Službene novine Federacije Bosne i Hercegovine”, br. 26/16, 89/18, 23/20, 44/22 i 39/24) (u daljem tekstu: Zakon o radu), usljed navršavanja godina života odnosno godina staža osiguranja u skladu sa propisima o penzijskom i invalidskom osiguranju, može zasnovati radni odnos u školi isključivo na određeno vrijeme u skladu sa odredbama člana 82. stav (3) tačka c) i tačka d) ovog zakona.“.

Član 10.

U članu 76. u stavu (1) riječi „uslova utvrđenih zakonom“ zamjenjuju se riječima „općih uslova propisanih članom 75a. ovog zakona“.

Tačka c) briše se.

Stav (4) briše se.

Član 11.

U članu 82. u stavu (1) riječi „i objavljuje u dnevnom listu i“ zamjenjuju se riječima „i u skraćenom obliku (verziji) objavljuje u dnevnom listu dok se integralni tekst konkursa objavljuje na internet stranici Ministarstva, te“.

U stavu (2) iza riječi „oglasa,“ dodaju se riječi „i angažovanjem zaposlenika na određeno vrijeme radi obezbjeđenja stručne zastupljenosti nastave i obavljanja drugih neophodnih poslova, do raspisivanja konkursa, odnosno oglasa, odnosno do okončanja postupka po raspisanom konkursu, odnosno oglasu ili radi zamjene odsutnog zaposlenika škole (bolovanje, neplaćeno odsustvo, iznenadni prekid radnog odnosa), do kraja započetog polugodišta,“.

U stavu (3) u tački f) riječi „do punog radnog vremena“ zamjenjuju se riječima „dopunom radnog vremena ali ne više od punog radnog vremena,“.

U istom stavu u tački g) riječi „iz jedne u drugu osnovnu, odnosno iz osnovne u srednju školu,“ zamjenjuju se riječima „iz jedne u drugu osnovnu ili srednju školu na zahtjev zaposlenika, a“.

Iza stava (8) dodaje se novi stav (9) koji glasi:

„(9) Ukoliko se po okončanju konkursa ne bude mogao izabrati kandidat u skladu sa stavom (3) ovog člana, škola može angažovati zaposlenika bez zasnivanja radnog odnosa u cilju realizacije nastavnog procesa za deficitarna zanimanja, koja se utvrđuju posebnim aktom ministra, a za koja je potrebno angažovati stručne kadrove koji su u radnom odnosu kod drugog poslodavca.“.

Dosadašnji stavovi (9), (10), (11), (12), (13) i (14) postaju stavovi (10), (11), (12), (13), (14) i (15).

U dosadašnjem stavu (12) koji postaje stav (13) riječi „(„Službene novine Federacije BiH“, br. 26/16, 89/18 i 23/20) - (u daljem tekstu: Zakon o radu)“ brišu se.

U dosadašnjem stavu (14) koji postaje stav (15) tekst „(13)“ zamjenjuje se tekstem „(14)“.

Član 12.

U članu 85. u stavu (2) riječi „najmanje jednom u četiri“ zamjenjuju se riječima „svake dvije“.

Član 13.

U članu 93. stav (1) mijenja se i glasi:

„(1) Pripravnik je lice koje prvi puta zasniva radni odnos u školi radi stručnog osposobljavanja za samostalan rad u obrazovanju s ciljem polaganja stručnog ispita.“.

U stavu (3) riječi „a najduže godinu dana“ zamjenjuju se riječima „u trajanju od 12 mjeseci“.

Član 14.

U članu 94. riječi „Ako je stručni ispit ili radno iskustvo utvrđeno zakonom ili pravilnikom o radu uslov za obavljanje poslova određenog zanimanja, škola može lice koje je završilo školovanje za takvo zanimanje“ zamjenjuju se riječima „Lice koje mora proći kroz stručno osposobljavanje za samostalan rad u obrazovanju kako bi položilo stručni ispit može se“ a tekst „(„Službene novine Federacije BiH“, br. 26/16 i 89/18)“ briše se.

Član 15.

Član 104a. briše se.

Član 16.

U članu 106. u stavu (2) iza riječi „uslova“ dodaju se riječi „propisanih članom 75a. ovog zakona“.

Član 17.

U članu 108. iza stava (14) dodaje se novi stav (15) koji glasi:

„(15) Direktor škole iz stava (1) ovog člana ima obavezu da u prvoj godini svog mandata prođe postupak usavršavanja u skladu sa katalogom stručnog usavršavanja koji donosi Pedagoški zavod.“.

Član 18.

U članu 110a. u stavu (4) iza riječi „dana“ dodaju se riječi „a u slučaju da privremena spriječenost za rad traje duže od 60 dana Školski odbor ovlaštenje iz stava (1) ovog člana može produžiti za dodatnih 60 dana“.

Član 19.

U članu 112. u stavu (1) iza riječi „Ministarstva“ dodaju se riječi „ , inspekcijaskog nadzora“.

Član 20.

Član 114a. briše se.

Član 21.

U članu 130. tačka c) mijenja se i glasi:

„c) ostvarivanjem vlastitih javnih prihoda od iznajmljivanja i prodaje proizvoda, roba i usluga u skladu sa propisima kojima se reguliše oblast vlastitih javnih prihoda u Federaciji Bosne i Hercegovine.“.

Član 22.

U članu 132. stav (2) mijenja se i glasi:

„(2) Inspekcijaski nadzor nad provođenjem ovog zakona i propisa donesenih na osnovu ovog zakona, naročito u pogledu odgojno-obrazovnog rada škole, upisa i ocjenjivanja učenika, zapošljavanja i radnih odnosa zaposlenika škole i uslova za zaključivanje ugovora o radu zaposlenika škole, rada školskih organa i tijela te stručnih organa škole, vrši nadležna inspekcija za obrazovanje.“.

Član 23.

Član 133. mijenja se i glasi:

„Član 133 (Kaznene odredbe)

(1) Novčanom kaznom od 2.000 do 5.000 KM kazniće se za prekršaj škola:

a) ako postupi suprotno odredbi član 8. i onemogući upotrebu u nastavi bilo kojeg službenog jezika ili službenog pisma,

- b) ako postupi suprotno odredbi člana 18. stav (2) i otpočne sa radom prije nego što je upisana u Registar koji vodi Ministarstvo,
- c) ako postupi suprotno odredbi člana 18. stav (4) i izda svjedodžbu ili drugu javnu ispravu o završenom obrazovanju prije nego što je upisana u Registar,
- d) ako postupi suprotno odredbi člana 21. i upiše učenika sa drugog školskog područja bez saglasnosti Ministarstva,
- e) ako postupi suprotno odredbi člana 22. i ne upiše učenika koji je doselio na područje škole i ako ga upiše bez prevodnice,
- f) ako redovno ne ažurira i ne prati internet stranicu i e-mail adresu u skladu sa članom 23. stav (8),
- g) ako ne postupa u skladu sa propisom iz člana 23a. stav (1),
- h) ako istakne simbole u školi suprotno odredbi člana 24.,
- i) postupi suprotno odredbi člana 29. stav (1) i vrši diskriminaciju djece u pristupu djece obrazovanju ili njihovom učešću u obrazovnom procesu,
- j) ako postupi suprotno odredbi člana 32. stav (1) i omogući organizovanje i djelovanje političkih stranaka i njihovih podmladaka,
- k) ako postupi suprotno odredbi člana 33. stav (3) i izvodi nastavu po nastavnom planu i programu koji nije donijelo Ministarstvo,
- l) ako ne postupa u skladu sa propisom iz člana 37. stav (9),
- m) ako postupi suprotno odredbi člana 41. stav (1) i bez odluke Ministarstva prekine nastavu,
- n) ako postupi suprotno odredbi člana 42. stavovi (3), (4) i (5),
- o) ako postupi suprotno odredbi člana 43. stav (4) i organizuje manifestaciju koja nije utvrđena godišnjim programom rada škole bez prethodne saglasnosti Ministarstva,
- p) ako organizuje izlete, stručne posjete, stručne ekskurzije, ekskurzije, logorovanja, ili realizuje studentske posjete, razmjene učenika, posjete školama i druge aktivnosti učenika i nastavnika izvan Bosne i Hercegovine suprotno odredbama člana 45.,
- r) ako postupi suprotno odredbi člana 48. stavovi (1) i (3) pa se u školi upotrebljavaju udžbenici, radni udžbenici i nastavna sredstva koja nije odobrilo Ministarstvo,
- s) ako ne izvrši upis učenika na način kako je to utvrđeno odredbom člana 49. stav (1),
- t) ako postupi suprotno odredbi člana 49. stav (4) i izvještaj o upisu ne dostavi osnivaču i Pedagoškom zavodu u određenom roku,
- u) ako postupi suprotno odredbi član 52. stav (1) i ne uputi učenika, bez odlaganja, na komisiju, kada kod njega nastupe promjene koje zahtijevaju prelaz iz specijalne škole u redovnu ili iz redovne u specijalnu školu,
- v) ako postupi suprotno odredbi člana 53. stav (2) i ne omogući sticanje osnovnog obrazovanja učenika sa posebnim potrebama,
- z) ako vrši opterećenje nastavnika suprotno odredbi člana 89.,
- aa) ako postupi suprotno odredbi člana 98. stav (1) i ne omogući sticanje viših stručnih zvanja nastavnicima i stručnim saradnicima,
- bb) ako postupi suprotno odredbama člana 108. stavovi (1), (2), (4) i (5),
- cc) ako ne postupa u skladu sa odredbom člana 111. stav (1) tačka o) i ne obustavi od izvršenja opći akt školskog odbora za koji smatra da je u suprotnosti sa ustavom ili zakonom kao i pojedinačni akt kojim se nanosi šteta školi ili društvenoj zajednici.

(2) Za prekršaje iz stava (1) ovog člana kazniće se i odgovorno lice u školi novčanom kaznom od 1.000,00 do 2.000 KM.”.

Član 24.

U članu 134. u stavu (1) riječi „od 500 do 2.000 KM“ zamjenjuju se riječima „od 1.000 do 3.000 KM“.

U istom stavu dodaje se nova tačka a) koja glasi:

„a) ako upiše učenika suprotno odredbi člana 21. stav (4),“.

Dosadašnje tačke a), b), c), d), e), f), g), h), i) i j) postaju tačke b), c), d), e), f), g), h), i), j) i k).

U stavu (2) riječi „od 200 do 800 KM“ zamjenjuju se riječima „od 500 do 1.500 KM“.

Iza stava (2) dodaje se novi stav (3) koji glasi:

„(3) Novčanom kaznom od 500 do 1.500 KM kazniće se predsjednik i članovi školskog odbora ukoliko ne postupe u skladu sa članovima 105. stav (1) i 108. stav (1).“.

Član 25.

(Donošenje podzakonskih akata)

(1) U roku od šest mjeseci od dana stupanja na snagu ovog zakona ministar će donijeti propis iz člana 23a. Zakona.

(2) U roku od šest mjeseci od od dana stupanja na snagu ovog zakona ministar će donijeti propis iz člana 45. stav (1) Zakona.

(3) U roku od šest mjeseci od dana stupanja na snagu ovog zakona ministar će donijeti propis iz člana 45. stav (4) Zakona.

(4) U roku od šest mjeseci od dana stupanja na snagu ovog zakona ministar će donijeti akt iz člana 82. stav (9) Zakona.

(5) Do donošenja propisa iz stava (2) ovog člana primjenjivat će se postojeći propisi izuzev odredaba koje su u suprotnosti sa zakonom.

Član 26.

(Stupanje na snagu)

Ovaj zakon stupa na snagu narednog dana od dana objavljivanja u „Službenim novinama Tuzlanskog kantona“.

BOSNA I HERCEGOVINA
Federacija Bosne i Hercegovine
TUZLANSKI KANTON
Skupština
Broj:
Tuzla,

Predsjednik
Skupštine Tuzlanskog kantona

Žarko Vujović

O B R A Z L O Ž E N J E

Nacrta Zakona o izmjenama i dopunama Zakona o osnovnom odgoju i obrazovanju

I – PRAVNI OSNOV ZA DONOŠENJE ZAKONA

Pravni osnov za donošenje ovog Zakona sadržan je u poglavlju IV 2. član 24. c) Ustava Tuzlanskog kantona („Službene novine TPK“, broj: 7/97 i 3/99 i „Službene novine TK“, broj: 13/99, 10/00, 14/02, 6/04 i 10/04), kojim je utvrđeno da Skupština Tuzlanskog kantona donosi zakone i ostale propise neophodne za izvršavanje nadležnosti Kantona.

II – RAZLOZI ZA DONOŠENJE ZAKONA

Razlozi za donošenje Zakona o izmjenama i dopunama Zakona o osnovnom odgoju i obrazovanju su višestruki. Prije svega ovim zakonom se usklađuju postojeće odredbe sa zakonima koji regulišu oblast radnih odnosa ali i uvode nove odredbe kojima se vrši ujednačavanje sa ostalim oblastima koje se regulišu propisima Tuzlanskog kantona kao i usklađivanje sa odredbama propisa viših nivoa. Pored navedenog jedan od razloga je i popunjavanje pravnih praznina uočenih kroz primjenu osnovnog teksta zakona te jasnije preciziranje normi koje se odnose na radne odnose zaposlenika kako bi se postigla bolja prohodnost i omogućilo lakše ostvarivanje prava iz radnog odnosa. Jedan od razloga je svakako i jačanje uloge nadležne inspekcije za obrazovanje kroz dodatne kaznene odredbe, povećanje iznosa postojećih novčanih kazni te jasnije definisanje uloge inspekcije.

III – OBRAZLOŽENJE POJEDINIH RJEŠENJA

Član 1. vrše se izmjene postojećeg člana 21. kako bi se jasnije definisao način utvrđivanja školskih područja obzirom da je predmetna materija duže vrijeme zanemarena, također se jasnije definiše mogućnost promjene školskog područja učenika dodavanjem novih uslova koje moraju biti ispunjeni za davanje saglasnosti za promjenu.

Član 2. vrši se dopuna postojećeg člana 23. novim stavom kojim se propisuje obaveza škola čiji je osnivač Skupština Tuzlanskog kantona na korištenje, redovno ažuriranje i praćenje veb stranica i e-mail adresa koji su im omogućene na jedinstvenoj domneni skolatk.edu.ba.

Član 3. dodaje se novi član 23a. kojim se propisuje obaveza školama isticanja simbola i obilježja Bosne i Hercegovine te intoniranja himne Bosne i Hercegovine na način koji će biti bliže regulisan posebnim propisom koji donosi ministar obrazovanja i nauke.

Član 4. vrši se izmjena člana 24. kojim se reguliše koji su simboli neprihvatljivi i zabranjeni u školi obzirom da je utvrđeno da je dosadašnja norma sadržavala određene nelogičnosti koje su mogle dovesti do pogrešnog tumačenja same norme.

Član 5. vrši se izmjena postojećeg člana 37. stav (4) kako bi se norma učinila jasnijom.

Član 6. vrši se dopuna postojećeg člana 39. stav (2) tačka a) kako bi se norma učinila jasnijom.

Član 7. vrši se dopuna u postojećem članu 40. i to u stavovima (2) i (3) koji se odnose na završetak nastavne godine i povezuje isti sa realizacijom nastavnih sadržaja u okviru godišnjeg fonda nastavnih časova i broja nastavnih dana.

Član 8. izmjenom člana 45. uređuju se način izvođenja izleta, stručnih posjeta, ekskurzija, logorovanja odnosno da će isti biti utvrđen propisom koji donosi ministar ali također se uvodi i obaveza pribavljanja prethodne saglasnosti ministarstva kod obavljanja drugih aktivnosti učenika i nastavnika koje se realizuju van Bosne i Hercegovine i to u skladu sa propisom koji donosi ministar.

Član 9. dodaje se novi član 75a. kojim se propisuju opći uslovi za zasnivanje radnog odnosa u školi po uzoru na druge djelatnosti čiji rad se reguliše propisima Tuzlanskog kantona te utvrđuje i

izuzetak za zapošljavanje lica koja su stekla uslove za penziju, odnosno da ista u školi mogu biti angažovana isključivo na određeno vrijeme i to za zamjenu odsutnog zaposlenika ili pak za izvođenje nastave do raspisivanja konkursa/oglasa ili do okončanja istih ukoliko su već raspisani, što podrazumijeva da ova lica ne mogu biti primljena u radni odnos putem konkursa/oglasa.

Član 10 vrši se izmjena postojećeg člana 76. a vezano za dodavanje novog člana kojim se regulišu opći uslovi za zasnivanje radnog odnosa u školi.

Član 11. vrše se izmjene u članu 82. kako bi se omogućila lakša i efikasnija objava konkursa/oglasa za prijem u radni odnos zaposlenika te izmjene koje jasnije i preciznije regulišu dopunu normi i sporazumne prelaske zaposlenika škola, kao i prijem zaposlenika u školama čiji osnivač nije Skupština Tuzlanskog kantona te uvodi mogućnost angažovanja lica zaposlenih kod drugog poslodavca u slučaju deficitarnih zanimanja, a radi se o usklađivanju sa Zakonom o srednjem obrazovanju i odgoju.

Član 12. vrši se izmjena u članu 85. stav (2) kako bi se isti uskladio sa odredbama Kolektivnog ugovora za djelatnost osnovnog obrazovanje u Tuzlanskom kantonu.

Član 13. Vršiti se izmjena postojećeg člana 93. stav (1) i daje nova definicija pripravnika koja je primjerenija oblasti obrazovanja te se precizira trajanje pripravničkog staža.

Član 14. vrši se izmjena člana 94. kako bi se isti učinio jasnijim obzirom na poteškoće koje su se javile u primjeni te se briše nepotrebnii tekst obzirom da je ranije izvršeno skraćivanje naziva Zakona o radu.

Član 15. ovom odredbom briše se postojeći član 104a. obzirom da je presudom Ustavnog suda Federacije Bosne i Hercegovine, broj: U-25/22 od 18.4.2023. godine utvrđeno da predmetna odredba nije u skladu sa Ustavom Federacije Bosne i Hercegovine.

Član 16. vrši se izmjena člana 106. stav (2) na način da se u uslovima za imenovanje direktora škole poziva na novi član kojim se regulišu opći uslovi za zasnivanje radnog odnosa, koje mora ispunjavati i kandidat za direktora škole.

Član 17. vrši se dopuna člana 108. novim stavom (15) kojim se po uzoru na istovjetnu normu u zakonu o srednjem obrazovanju i odgoju utvrđuje obaveza direktorima škola da u prvoj godini mandata prođu postupak usavršavanja.

Član 18. vrši se dopuna člana 110a. stav (4) obzirom na činjenicu postojanja dugotrajnijih bolovanja direktora škola.

Član 19. vrši se dopuna člana 112. odnosno stav (1) tog člana kako bi se uskladio sa odredbama kojima se regulišu ista materija Zakonom o srednjem obrazovanju i odgoju.

Član 20. ovom odredbom briše se postojeći član 114a. obzirom da je presudom Ustavnog suda Federacije Bosne i Hercegovine, broj: U-25/22 od 18.4.2023. godine utvrđeno da predmetna odredba nije u skladu sa Ustavom Federacije Bosne i Hercegovine.

Član 21. vrši se izmjena člana 130. tačka c). kako bi se jasnije definisalo šta su vlastiti prihodi škole i predmetna materija uskladila sa propisima viših nivoa vlasti.

Član 22. vrši se izmjena člana 132. tačka c) na način da se jasnije definiše uloga nadležne inspekcije za obrazovanje po pitanju nadzora nad provođenjem zakona i propisa donesenih na osnovu zakona.

Članovima 23. i 24. vrše se izmjene kaznenih odredbi zakona i to povećanjem iznosa novčanih kazni za prekršaje te uvođenjem novih prekršaja koji proizilaze iz novih odredbi koje se dodaju u zakon.

Član 25. propisuje se rok za donošenje novih podzakonskih akata te nastavak primjene postojećih.

Član 26. definiše se momenat stupanja na snagu ovog zakona.

IV – FINANSIJSKA SREDSTVA

Ni jedna od predloženih odredbi Zakona o izmjenama i dopunama Zakona o osnovnom odgoju i obrazovanju, ne iziskuje dodatna finansijska sredstva u Budžetu Tuzlanskog kantona za 2024. godinu kao ni naredne budžetske godine što je definisano i obrascu IFP - NE.

V – PRIJEDLOG

Na osnovu izloženog predlažemo Skupštini Tuzlanskog kantona da po redovnom postuku shodno odredbama člana 124. Poslovnika Skupštine Tuzlanskog kantona uvrsti utvrđeni nacrt Zakona o izmjenama i dopunama Zakona o osnovnom odgoju i obrazovanju, na prvu narednu sjednicu Skupštine Tuzlanskog kantona.

OBRAĐIVAČ
MINISTARSTVO OBRAZOVANJA I NAUKE